

# REGLUR

## um vélknúin leiktæki í skemmtigörðum.

### 1. gr.

#### Almenn ákvæði.

- 1.1 Reglur þessar gilda um búnað, rekstur og eftirlit með vélknúnum leiktækjum sem taka farþega í skemmtigörðum. Hér eftir nefnd vélknúin leiktæki.
- 1.2 Rekstur vélknúinna leiktækja er óheimill nema að fengnu rekstrarleyfi Vinnueftirlits ríkisins. Sótt skal um rekstrarleyfi með nægum fyrirvara. Með umsókn skulu fylgja fullnægjandi gögn um gerð, búnað og tilhögun rekstrar. Sækja skal um rekstrarleyfi fyrir hvert einstakt leiktæki.
- 1.3 Sá sem hefur með höndum rekstur vélknúinna leiktækja er ábyrgur fyrir því að búnaður og frágangur þeirra sé í samræmi við gildandi lög og reglur. Hann skal hafa tryggingu fyrir því tjóni sem hann kann að verða ábyrgur fyrir.
- 1.4 Kostnað vegna eftirlits með vélknúnum leiktækjum skal eigandi greiða samkvæmt gjaldskrá Vinnueftirlits ríkisins.

### 2. gr.

#### Uppsetning og frágangur.

- 2.1 Vélknúin leiktæki skulu vera þannig gerð, uppsett og frá þeim gengið að farþegar geti farið í þau, verið í þeim og farið úr þeim á öruggan hátt.
- 2.2 Vélknúin leiktæki skulu vera afgirt þannig að fólk komist ekki það nærri þeim að hætta geti stafað af.
- 2.3 Girðingar skulu vera til að stjórna umferð þeirra sem fara í leiktækin og úr þeim. Merkingar fyrir umferð skulu vera greinilegar.
- 2.4 Undirstöður vélknúinna leiktækja skulu vera traustar og þannig frá þeim gengið, að ekki sé hætt á að þær láti undan eða skekkist.

### 3. gr.

#### Vélbúnaður og burðarvirki.

- 3.1 Vélbúnaður og burðarvirki skulu vera traust og þola það álag sem þau geta orðið fyrir við óhagstæðustu skilyrði. Við hönnun skal farið eftir gildandi Evrópustöðlum (EN) eða öðrum stöðlum eða reglum sem Vinnueftirlit ríkisins viðurkennir.
- 3.2 Við alla hreyfanlega hluta vélbúnaðar skulu vera hlífar, sé hætt á að þeir geti valdið slysum.
- 3.3 Sé brunahreyfill notaður til að knýja leiktæki skal hann búinn góðum hljóðdeyfi og tryggt að útblástur hans valdi ekki starfsmönnum eða öðrum heilsutjóni eða óþægindum.
- 3.4 Aðrar reglur Vinnueftirlits ríkisins gilda ennfremur um vélknúin leiktæki og skemmtigarða þar sem starfsmenn geta verið við vinnu.

### 4. gr.

#### Rafbúnaður.

- 4.1 Allur rafbúnaður skal vera samkvæmt gildandi reglum um raforkuvirki.
- 4.2 Rofar skulu vera þannig gerðir að ekki sé hætt á að óviðkomandi geti gangsett vélknúin leiktæki eða það verði gangsett í ógáti.

## 5. gr.

**Leiðbeiningar um uppsetningu, viðhald og rekstur.**

- 5.1 Sá sem flytur inn selur eða afhendir vélknúin leiktæki skal sjá til þess að til séu nauðsynlegar leiðbeiningar á íslensku um uppsetningu, viðhald og notkun viðkomandi leiktækis. Þær skulu m.a. leiðbeina um eftirfarandi:
- Stjórnun og öryggisbúnað.
  - Daglegt og kerfisbundið eftirlit.
  - Stillingu og frágang á samsetningar- og festibúnaði.

## 6. gr.

**Rekstur og ábyrgð starfsfólks.**

- 6.1 Sá sem hefur með höndum rekstur vélknúinna leiktækja skal tilnefna rekstrarstjóra og staðgengil hans. Rekstrarstjóri skal hafa yfirumsjón með rekstrinum og sjá um að gæslumenn fái fullnægjandi kennslu í að framkvæma störf sín á réttan og öruggan hátt. Rekstrarstjóri skal kunna skil á þeim lögum og reglum sem um reksturinn gilda og sjá til þess að uppsetning og rekstur sé í samræmi við þær. Rekstrarstjóri skal vera orðinn fullra 20 ára.
- 6.2 Heimilt er að ráða gæslumenn til að annast rekstur vélknúinna leiktækja og daglegt efirlit með þeim undir yfirstjórn rekstrarstjóra. Gæslumenn skulu vera orðnir fullra 17 ára og hafa næga þekkingu, þjálfun og hæfni til að stjórna viðkomandi leiktæki. Gæslumenn skulu sjá um að rekstur gangi eðlilega og að farþegum eða öðrum stafi ekki hætta af.
- 6.3 Þegar vélknúid leiktæki er í notkun skal það vera undir stöðugri gæslu.
- 6.4 Rekstur vélknúins leiktækis skal stöðva sé rekstraröryggi ekki fyllilega tryggt.
- 6.5 Gæslumenn skulu sjá til þess að farþegar klæðist ekki fatnaði sem getur valdið slyshættu.

## 7. gr.

**Dagbók.**

- 7.1 Fyrir vélknúin leiktæki skal færa rekstrardagbók þar sem m.a. skal skrá:
- Tímasetningu notkunar og fjölda notkunartíma.
  - Staðfestingu á því að reynslukeyrsla og daglegt eftirlit hafi farið fram.
  - Viðgerðir sem framkvæmdar eru.
  - Öll óhöpp og óvenjuleg atvik við rekstur.

## 8. gr.

**Fyrsta skoðun.**

- 8.1 Áður en nýtt eða nýinnflutt vélknúid leiktæki er tekið í notkun, eða eftir að verulegar breytingar hafa verið gerðar á því, skal fara fram fyrsta skoðun sem Vinnueftirlit ríkisins framkvæmir.
- 8.2 Þegar skoðun fer fram skal eftirfarandi liggja fyrir:
- a) Staðfesting viðurkennds aðila á því að undirstöður séu í samræmi við samþykktar teikningar.
  - b) Staðfesting viðurkennds aðila á því að rafbúnaður sé í samræmi við gildandi reglur um raforkuvirki.
  - c) Staðfesting á að ábyrgðartrygging sé í gildi.

## 9. gr.

**Árlegt eftirlit.**

- 9.1 Svo lengi sem vélknúid leiktæki er í rekstri skal það skoðað árlega af Vinnueftirliti ríkisins.
- 9.2 Eftirlitsmaður Vinnueftirlitsins getur gert kröfu um að eigandi affli sér vottorða frá viðurkenndum aðila um ástand einstakra hluta vélknúins leiktækis.
- 9.3 Komi í ljós við eftirlit að vélknúid leiktæki eða búnaður þess brjóti í bága við þær reglur sem um það gilda er Vinnueftirliti ríkisins heimilt að afturkalla rekstrarleyfið.
- 9.4 Ákvörðun eftirlitsmanna og forstjóra Vinnueftirlits ríkisins má vísa til stjórnar Vinnueftirlitsins innan fjögurra vikna frá því að hún var birt, sbr. 98. gr. laga nr. 46/1980 um aðbúnað, hollustuhætti og öryggi á vinnustöðum. Ákvörðun stjórnar má á sama hátt áfrýja til ráðherra.

## 10. gr.

**Slysatilkynningar.**

- 10.1 Verði slys í eða við vélknúid leiktæki sem ætla má að leiði til líkamstjóns eða umtalsverðs skaða skal það tilkynnt Vinnueftirliti ríkisins í samræmi við reglur þar að lútandi.

## 11. gr.

**Viðurlög.**

- 11.1 Brot á reglum þessum varða sektum samkvæmt ákvæðum laga nr. 46/1980 um aðbúnað, hollustuhætti og öryggi á vinnustöðum. Með mál útaf brotum á reglum þessum skal farið að hætti opinberra mála.

## 12. gr.

**Gildistaka.**

- 12.1 Reglur þessar, sem settar eru af stjórn Vinnueftirlits ríkisins samkv. heimild í 34. gr., 38. gr. og 47. gr. laga nr. 46/1980 um aðbúnað, hollustuhætti og öryggi á vinnustöðum staðfestast hér með til að öðlast gildi þann 1. janúar 1992. Jafnframt staðfestir ráðuneytið að reglur þessar skuli gilda um öryggi almennings jafnt sem starfsmanna sem reka leiktækin, sbr. 3. mgr. 3. gr. laga nr. 46/1980.

*Félagsmálaráðuneytið, 25. september 1991.*

F. h. r.

**Berglind Ásgeirsdóttir.**

*Óskar Hallgrímsson.*